

ILUARSISAQ

Imartami sillimaniarnerup, umiarsuarnik nalunaarsuinerup, inatsiseqarnerup il.il. tamakkiisumik oqartussaaffigineqalersinnaaneri pillugit Naalakkersuisut UKA2016-mi nassuiaammik saqqummiussinissamik peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Nikolaj Jeremiassen, Siumut)

Akissuteqaat

(Ineqarnermut, Sanaartornermut Attaveqaqatigiinermullu Naalakkersuisoq)

Siullermeerinnineq

Naalakkersuisut sinnerlugit Inatsisartunut ilaasortaq Hr. Nikolaj Jeremiassen aalajangiiffigisassatut siunnersuuteqarneranut qutsavigaara.

Aallarniutigalugu ileqqorissaarnissaq eqqarsaatigalugu eqqumaffigeqqussavara imarsiornermut suliaasaqarfik Danmarkip oqartussaaffigimmagu, kisianni soorunami tamanna Kalaallit Nunaata imarsiornermut suliaasaqarfimmi annertuumik sunnuteqannginneranik imaluunniit suliaasaqarfimmi sunulluunniit akisussaaffeqartinneqannginneranik malitseqanngilaq. Naalakkersuisutut imarsiornermut akisussaasuusutut oqaatigisariaqarpara Ineqarnermut, Sanaartornermut Attaveqaqatigiinermullu Naalakkersuisoqarfiup imarsiornermut tunngatillugu politikikkut allaffissornikkullu Danmark pitsaasumik siunnerfeqarluartumillu suleqatigimmagu, aammalu Kalaallit Nunaata soqutigisai pitsaanerpaamik qulakkeerniarlugit Imarsiornermut Aqutsiveqarfimmit (Søfartstyresemit) annertuumik sulisoqarmat.

Imarsiornerup isumannaatsuunissaanut, umiarsuarnik nalunaarsuisarnermut aamma imarsiornermi inatsisinut tunngasunut tunngatillugu suliaasaqarfiup tamarmi akisussaaffigilerlugu tiguneqarnissaanut aningaasartuutissanut missingersuinernik Naalakkersuisut maannakkorpiaq saqqummiisinnaanngillat, tassami inaarutaasumik qanoq akeqarnissaanut tunngaviusut arlallit aalajangiisuulluinnarmata. Taamaattorli oqaatigineqassaaq suliaasaqarfiup tamarmi akisussaaffigilerlugu tiguneqarnissaa annertooujussuarnik aningaasartuuteqarfiusussaanera naatsorsuutigineqartariaqarmat.

Ilisimatitsissutigisinnaavara § 37 naapertorlugu Naalakkersuisunut apeqqummut nr. 196-imut tunngatillugu Imarsiornermut Aqutsiveqarfik qinnuiginikuugakku imarsiornerup isumannaatsuunissaata, umiarsuarnik nalunaarsuisarnerup aamma imarsiornermi inatsisinut tunngasut tamakkiisumik tiguneqassagaluarpata Namminersorlutik Oqartussat aningaasartuutissaat qanoq annertutigissagaluarnersut missingersuummik saqqummeeqqullugu. Imarsiornermut Aqutsiveqarfiup qinnuiginninnerput tunngavigalugu nalunaarutigaa, missingersuummik saqqummiussisinnaanissamut, suliaasaqarfimmi taaneqartuni annertuumik misissueqqissaarnissaq pisariaqartoq, tassani tunngaviusussat arlallit isiginiarneqartussaammata. Misissueqqissaarnerit taamaattut isumalluutininik arlalinnik atuiffigisariaqartussaapput, tamannalu aallaavigalugu Imarsiornermik Aqutsiveqarfik naliliivoq aatsaat 2016-ip aallartinnerani missingersuut qinnutigisarput saqqummiussinnaassallugu.

Uanga naliliinera naapertorlugu, imarsiornermik suliaasaqarfik nunatsinnut angerlaatissagaluarutsigu Namminersorlutik Oqartussanut annertuumik aningaasartuuteqarnerulernermik nassataqartussaavoq. Taamatulli oqareerlunga, ilanngullugu oqaatigissavara, suliaasaqarfik angerlaanneqassagaluarpat kingunissaasinnaasut assigiinngitsut pillugit piffissap ingerlanerani Naalackersuisut nalilersuisarmata. Taamaattorli imarsiornermut suliaasaqarfiup isumannaatsumik isumagineqarnissaa tamatigut pingaarnepaajutinneqartussaavoq, tassani innuttaasut, inuussutissarsiortut allallu soqutigisaqartut eqqarsaatigineqassallutik.

Naggataatigut oqaatigissavara, ukiuni kingulliunerusuni annertoorujussuarmik suliniuteqartoqarmat danskit oqartussaasuisa tungaanniit Kalaallit Nunaanni imarsiornerup pingaarnersiuinermi salliutinneqarnissaanut. Tassunga atatillugu aamma oqaatigissavara Kalaallit Nunaanni imarsiornermut suliaasaqarfiup isumaginissaanut Imarsiornermut Aqutsiveqarfik tamatigoortorujussuarmik piginnaasaqarmat, uangalu Naalackersuisutut suliaasaqarfimmi akisussaasutut nalilerpara isumannaatsuusoq.

Naalackersuisut naliliipput, suliaasaqarfiup tamarmiusup akisussaaffigilerlugu tiguneqarsinnaanissaanut qulaajaanermik suliaqarnissaq pissusissamisuussasoq. Tamanna tunngavigalugu aalajangiiffigisassatut siunnersuutip akuersaartumik suliarineqarnissaa Naalackersuisut tungaannit ilalerneqarpoq.

Taamatut oqaaseqarlunga aalajangiiffigisassatut siunnersuut Inatsisartuni kajumittumik suliaasanngortippara.